

Teks Ucapan
Naib Canselor UniMAP
Brigedier Jeneral Dato' Prof. Dr. Kamarudin Hussin
Sempena
Mesyuarat Agung Kelab Kakitangan KUKUM Kali Ke-5
Di Dewan Kapitol UniMAP Pada 11 Mei 2009

Bismillah Hirrahrman Nirrahim, Assalamualaikum
Warahmatullahi Wabarakatuh Dan Salam Sejahtera,

Alhamdulillah dan syukur kita kehadiran Ilahi kerana
dengan limpah kurnia-Nya dapat kita bersama-sama pada
Mesyuarat Agung Kelab Kakitangan KUKUM kali ke- 5 ini.

Terlebih dahulu saya ingin mengambil kesempatan ini untuk
mengucapkan tahniah kepada kontijen UniMAP yang berjaya
memperolehi tempat keempat pada Kejohanan Sukan Badan
Berkanun yang diadakan di Langkawi pada 28 April -3 Mei
2009 lalu.

Saya juga ingin mengucapkan syabas dan tahniah kepada
ahli-ahli jawatankuasa Mesyuarat Agung Kelab Kakitangan
KUKUM di atas inisiatif mereka berkongsi idea dalam
menyempurnakan dan seterusnya melangsung kerja majlis
kita pada hari ini

Hadirin dan hadirat yang dihormati sekalian,

Seperti yang pernah saya katakan pada ucapan saya sebelum ini, saya mengharapkan fungsi serta peranan yang dimainkan oleh sesebuah kelab harus benar-benar berada pada landasan serta objektif penubuhannya. Apakah ertinya penubuhan sesebuah kelab jika ia gagal memainkan peranannya. Jangan jadikan sesebuah kelab atau persatuan seperti enau di dalam belukar, hanya melepaskan pucuk masing-masing sedangkan nun jauh di hadapannya tersirat seribu satu macam agenda yang belum diterokai.

Kejayaan sesebuah kelab bukan sahaja terletak kepada daya kepimpinan presidennya yang dinamik serta penuh karismatik tetapi memerlukan sokongan yang padu dari kesemua ahli-ahli yang menganggotai kelab tersebut.

Saya difahamkan bagi tempoh sepanjang tahun lalu sahaja, pelbagai aktiviti termasuklah aktiviti kemasyarakatan dianjurkan oleh Kelab ini. Saya kira aktiviti yang dijalankan ini sangat proaktif dan menunjukkan peningkatan berbanding tahun-tahun sebelum ini.

Secara jujurnya, ingin saya katakan bahawa saya melihat kelab Kakitangan KUKUM telah berjaya membuktikan bahawa anda berada di landasan yang betul. Hal ini kerana, saya telah pun meneliti laporan aktiviti tahunan yang dihantar kepada saya dan saya dapati pelbagai aktiviti yang direncanakan telah mencapai matlamatnya.

Oleh itu untuk tahun ini saya ingin menyeru anda untuk melakukan penambahan terutamanya kepada aktiviti kemasyarakatan yang lebih mantap serta memberikan kebaikan kepada semua pihak termasuk kepada masyarakat di Negeri Perlis Indera Kayangan ini.

Sebagai contoh, saya melihat keprihatinan kelab kakitangan yang melakukan lawatan kepada Arwah Prof. Nasir Zainal Arif iaitu bekas pensyarah UniMAP yang telah pergi meninggalkan kita. Selain itu, kita juga sensitive bukan sahaja kepada kakitangan UniMAP tetapi juga kepada mereka yang berkaitan dan mempunyai hubungan kerja langsung dengan kita.

Pada tahun lepas kita kehilangan dua orang Media yang banyak memberi sokongan dan sumbangan kepada kita iaitu Ketua Biro Utusan Malaysia Perlis, Allahyarham Johari Shawal dan juga jurukamera RTM iaitu Allahyarham Sayal Yassin yang juga merupakan bapa kepada kakitangan UniMAP

itu sendiri iaitu Bapa Cik Syahida Sayal pembantu Tadbir Kesetiausahaan Pengurusan Akademik.

Saya melihat Kelab Kakitangan KUKUM dengan rasa prihatin telah menyumbangkan pertolongan dalam bentuk kewangan bagi menunjukkan sokongan kita kepada keluarga Allahyarham. Oleh itu, untuk tahun ini saya menyeru kepada ahli kelab untuk lebih aktif dan sensitive terhadap kesusahan yang dialami dan ditanggung oleh bukan sahaja kakitangan UniMAP malah kepada mereka yang berada di luar UniMAP tetapi seakan dekat bersama kita.

Hadirin dan hadirat yang dihormati sekalian ,

Apa yang membezakan kejayaan sebuah kelab dengan yang lain ialah idea dalam merancang atau mengadakan suatu aktiviti yang bukan sahaja belum atau tidak pernah diadakan malah ia juga mampu memberikan nilai tambah baik kepada ahli-ahlinya tetapi juga kepada masyarakat sekelilingnya.

Kelab kakitangan KUKUM yang dianggotai oleh warga kerja UniMAP sejak tahun 2004 dan telah mengadakan pelbagai aktiviti di peringkat universiti. Ikhlas saya katakan bahawa saya amat teruja dengan komitmen ahli-ahlinya dalam mengadakan pelbagai aktiviti walaupun kadang-kadang terbatas dek kekangan masa dan bebanan kerja. Syabas dan

tahniah saya ucapkan kepada presiden kelab dan pimpinan-pimpinan yang lain kerana telah menjalankan amanah serta tanggungjawab yang diberikan dengan sebaik mungkin.

Kepada presiden baru kelab kakitangan KUKUM yang akan dilantik nanti, saya yakin anda akan dapat meneruskan momentum kecemerlangan kelab kakitangan KUKUM seperti mana di dalam tahun-tahun terdahulu.

Tidak kira siapa yang akan dilantik kelak, setiap ahli kelab kakitangan KUKUM harus memberikan sokongan yang padu dan bersama-sama berikhtiar, berusaha dan bekerja sedaya upaya demi kejayaan Kelab kakitangan.

Saya mahu setiap ahli kelab kakitangan KUKUM memainkan peranan yang proaktif dan dinamik dengan semangat penuh toleransi, saling hormat-menghormati bekerja sebagai satu pasukan. Jangan biarkan budaya parasit meresap masuk di dalam kelab kakitangan KUKUM. Jika parasit ini merebak dan tidak ditangani dengan segera, ia akan menjadi duri dalam daging atau gunting dalam lipatan dan lambat laun kelab Kakitangan KUKUM akan berkubur begitu sahaja bagai angin lalu.

Sebelum mengakhiri ucapan pada pagi ini, saya sekali lagi ingin mengucapkan syabas dan tahniah kepada ahli jawatankuasa Program kerana telah bertungkus-lumus memastikan kelancaran majlis kita pada pagi ini. Sekalung tahniah juga diucapkan kepada barisan pimpinan baru kelab kakitangan KUKUM yang akan dilantik kelak.

Dengan lafaz Bismillah Hirrahman Nirrahim, saya dengan ini merasmikan Mesyuarat Agung Kelab Kakitangan KUKUM bagi Tahun 2009 ini. Saya sudahi dengan, Wassalamualaikum Warahmatullahi Taala Wabarakatuh.